

FPP BizNewz

June - November 2022

MANAGEMENT • INVESTMENT • ECONOMICS • ENTREPRENEURSHIP • TECHNOLOGY

Endometriosis

Sejauh Mana Kesedaran Anda?

Personal Shopper

What You Need To Know

Sustainable Packaging in eCommerce

A Few Solutions to Protect the Planet

Type text here

How To Teach Your Children To Pack Their Backpacks For Travel? An Easy Guide

A Short Vacay in Hat Yai

My Sister, My Best Friend

Kredit Mikro di Malaysia

H0BI



Publication Date
8 November 2022

Photo by Matt Chambers on Unsplash



Thailand merupakan negara jiran yang sering menjadi pusat tumpuan percutian rakyat Malaysia. Antara lokasi tumpuan pelancong Malaysia termasuk Bangkok, Krabi, Koh Samui, Phatthalung, Pattaya, Chiang Mai, Chiang Rai, Dannok, Hat Yai, Betong, dan Sungai Golok. Pihak Berkuasa Pelancongan Thailand menyatakan bahawa seramai 78,523 pelawat Malaysia telah memasuki negara tersebut dalam tempoh lima bulan pertama tahun ini. Antara faktor yang menarik kehadiran pelancong asing adalah kelemahan mata wang baht berbanding dolar Amerika Syarikat (USD), kos sara hidup rendah, dan harga bilik hotel yang berpatutan.



Hat Yai merupakan sebuah bandar yang terletak di Wilayah Songkhla, Thailand. Oleh kerana kedudukannya bersempadan dengan Malaysia, maka memang ramai rakyat Malaysia yang mengambil peluang untuk bercuti di sana. Hat Yai merupakan salah satu bandar yang terbesar di Thailand yang mempunyai banyak tarikan, terutamanya gerai makan, pusat urutan badan, dan tempat-tempat membeli-belah. Walaupun Thailand bukan negara Islam, tetapi tidak sukar untuk mencari makanan halal di sini. Fenomena percutian untuk menikmati syurga kulinari di Hat Yai adalah memadai dengan percutian singkat





selama 3 hari 2 malam atau 2 hari 1 malam. Selain laluan udara, anda boleh juga sampai ke Hat Yai menggunakan jalan darat sama ada dengan menaiki kereta, kereta api, mahupun bas.

Perjalanan selama 5 jam menggunakan Perkhidmatan Tren Elektrik (ETS) Kereta Api Tanah Melayu (KTMB) dari Sungai Buloh ke Padang Besar, Perlis berbaloi dengan harga tiket ETS hanya MYR97 untuk penumpang dewasa dan MYR53 untuk kanak-kanak. Manakala kos menaiki van dari Padang Besar ke Hat Yai hanya MYR25 seorang.



Pada percutian kali ini kami sempat mengunjungi lebih daripada sepuluh (10) lokasi menarik sekitar Hat Yai dan Songkhla. Di sini kami menyewa perkhidmatan tut tut En Ariffin dan kami tidak mengalami kesukaran dari segi komunikasi kerana beliau boleh berbahasa Melayu dengan pelat Siam. Kos bagi tut tut hanya THB1500 iaitu sekitar MYR180 dari jam 8.00 pagi ke 10.00 malam. Perjalanan sangat lancar dan beliau membawa kami ke tempat-tempat yang menarik untuk bergambar. Antara tempat kunjungan popular bagi para pelancong adalah seperti:

1. Chabura Dimsum

Kami tiba di Hat Yai sekitar jam 11.30 pagi dan terus makan tengah hari di Restoran Chabura Dimsum. Pelbagai pilihan jenis dim sum yang sangat popular di kalangan rakyat Malaysia. Selain dim sum, terdapat menu masakan Thai yang lain seperti tomyam, somtam, bubur ayam dan pelbagai masakan panas yang lain juga turut disediakan di sini. Harga makanan juga berpatutan untuk dinikmati seisi keluarga.

2. Khlong Hae Floating Market

Khlong Hae Floating Market mula beroperasi setelah ditutup sepanjang pandemic Covid-19. Ia juga dikenali sebagai Pasar Terapung yang merupakan lokasi pelancongan ikonik di Hat Yai. Terdapat berpuluh sampan bersusun indah di sepanjang tebing sungai yang menjual pelbagai jenis makanan Thailand yang menarik samada snek, makanan berat, minuman manis,

jus buah, pencuci mulut, makanan bersup dan lain-lain lagi selain dapat bergambar berlatar belakangkan keindahan budaya dan kemeriahan suasana pasar terapung ini.





3. ASEAN Night Bazaar

Ia merupakan pasar malam terbesar di bandar Hat Yai untuk "bershopping" dengan harga murah dan beroperasi selama 24 jam. Suasana semakin meriah pada waktu malam dengan keindahan lampu-lampu dan kehadiran pengunjung. Di aras 1 terdapat pelbagai jenis barangan seperti pakaian, aksesori, kasut, beg dan lain-lain, manakala di aras 2 pula terdapat gerai-gerai makanan Thai dan buah-buahan.

4. Kim Yong Market

Kim Yong Market merupakan pasar di mana pelancong boleh membeli pelbagai jenis kekacang dan kerepek yang unik. Walaupun kebanyakannya boleh didapati di Malaysia, namun harga yang ditawarkan jauh lebih murah.

5. Masjid Pusat Songkhla

Walaupun Thailand hanya merupakan negara minoriti Islam, terdapat Masjid Pusat Songkhla yang menjadi tempat ibadah umat Islam di sini. Masjid ini agak terkenal bukan sahaja kerana dikenali sebagai Taj Mahal di Thailand, malahan kerana fungsinya yang juga menjadi tempat pernikahan ramai orang yang datang ke negara ini.

6. Chang Puak Camp

Gajah merupakan haiwan yang sangat sinonim dengan Thailand. Selain menaiki gajah, anda juga boleh memberi makan dan bergambar dengan haiwan ini secara dekat. Anda sekeluarga juga boleh mencuba aktiviti lain yang ditawarkan di kem ini seperti memanah, All-Terrain Vehicle (ATV) ride, dan menembak. Anda juga berpeluang untuk melihat pertunjukan buaya dan boleh merasai pengalaman bergambar bersama buaya.



7. Samila Beach

Pantai Samila merupakan pantai yang putih bersih dan popular di Songkhla. Tarikan utama di sini adalah Golden Mermaid Statue, seekor patung ikan duyung sedang menyikat rambut yang dipercayai membawa tuah dan kekayaan kepada rakyat Songkhla. Terdapat beberapa versi cerita legenda berkenaan kewujudan puteri duyung ini. Walau apa versinya, pengunjung tidak akan melepaskan peluang untuk bergambar sebagai kenangan. Pantai Samila tidak dibenarkan untuk mandi-manda namun pengunjung boleh mengisi masa dengan aktiviti berkuda.

Banyak lagi tempat-tempat menarik yang boleh dilawati sepanjang berada di Hat Yai atau

Songkhla. Selain menikmati pemandangan, pasti pengunjung juga tidak melepaskan peluang untuk mencuba pelbagai keunikan pilihan makanan Thai yang halal dengan harga yang berpatutan. Antara menu popular adalah seperti coconut ice cream, udang galah goreng, pelbagai pilihan laksa (sup, kari hijau, tomyam dan lain-lain), telur goreng tiram, somtam dan bermacam lagi.

Walau ke mana dan di mana sekalipun tempat pilihan percutian kita, yang paling berharga adalah kenangan dan memori bersama di antara anak, keluarga dan teman-teman. Percutian kali ini memberi kepuasan kepada anak serta seisi keluarga yang lain bagi mengisi waktu lapang di musim cuti persekolahan. Sehingga berjumpa lagi.

Rujukan

1. KOSMO! "Pelancong Malaysia 'serbu' Thailand Julai Ini", 26 Jun 2022. <https://www.kosmo.com.my/2022/06/26/pelancong-malaysia-serbu-thailand-julai-ini/>





BizNewz 2022
Faculty of Business and Management
Universiti Teknologi MARA Cawangan Terengganu, Kampus Dungun
Sura Hujung, 23000 Dungun, Terengganu, MALAYSIA
Tel: +609-8400400
Fax: +609-8403777
Email: biznewzuitm@gmail.com